

HELICOPTERNAN NOBO DI WARDACOSTA CARIBE HULANDES TA OPERACIONAL



DOS MINISTER Y
PRESIDENTE DI PARLAMENTO


**CULPABEL NA
“GRENDOVERSCHRIJDEND
GEDRAG”**

PARLAMENTARIO ARTHUR DOWERS

**2.1 MIYON FLORIN
PA EDISON BRIESEN
PERO NI TIN PLACA
PA SCHOOLGELD**

ANALISIS

**GABINETE WEVER CROES
II FALTA INTEGRIDAD PA
TUMA SU PROPIO RETIRO**



Market Leader of Business Software in the Caribbean

= exact

Solutions for:

- Finance
- Wholesale Distribution
- Professional Services
- HRM, CRM and BPM

*Supports All Your
Business Activities & Processes!*

VCC
International NV

Tel. 583-7072 | info@vcc-int.com | www.vcc-int.com

Dos Minister y Presidente di Parlamento

Culpabel na “Grensoverschrijdend Gedrag”

Pa algun aña caba, tin un lucha tumando luga na varios pais rond mundo, pa proteha principalmente hende muhe, contra di actuacion ‘inacceptabel’ di otro hendenan, sea na pia di trabou, den organisacionnan religioso y deportivo pero tambe na scolnan.

Na Merca algun aña atras, a lanta e movimiento #METOO caminda miles y miles di caso a bin na publicidad caminda principalmente hendenan muhe, tabata victima di comportacion nan inapropia dor di principalmente sernan masculino pero tambe femenino.

Celebridadnan a wordo condena, figuranan deportivo hopi popular deteni y husga pero tambe den e sector di gobernacion di varios pais, mas y mas sernan femenino a haya e curashi pa bin dilanti y denuncia comportacion inadecuado y irrespetuoso contra di nan den diferente pais.

Loke a sosode diaranson ultimo den Parlamento di Aruba, sin duda ta cay den loke na Hulandes ta conoci como “grensoverschrijdend gedrag”, pues un trato cu ta supera e limite di respet aceptabel pa un individuo.

Buscando mas informacion entre otro a bin haya lo siguiente:

Bij grensoverschrijdend gedrag brengt iemand een ander schade toe op fysiek, mentaal of emotioneel vlak. Dit uit zich bijvoorbeeld in seksuele intimidatie of zelfs seksueel misbruik, pesterijen, discriminatie of agressie. Grensoverschrijdend gedrag kan overal voorkomen, dus ook binnen organisaties en bedrijven.”

Pues un splicacion amplio riba tur loke ta nifica ora un persona ta falta respet total pa un otro, entre otro haciendo observacionnan no corecto y totalmente for di sla, caminda tambe a ser muestra lo siguiente, ora cu analisa loke a pasa siman pasa den parlamento, caminda Minister Xiomara Maduro, Presidente di Parlamento Edgard Vrolijk y Minister Geoffrey Wever a forma parti di un asina yama “grensoverschrijdend gedrag”:

“Grensoverschrijdend gedrag hangt vaak samen met macht. Wanneer twee mensen verschillende machtsposities hebben, is er geen sprake van gelijkwaardigheid. Het is voor degene met de minste macht moeilijker om een grens aan te geven, omdat die persoon afhankelijk is van degene met de meeste macht.”

Siman pasa na momento cu e tres personanan menciona a falta respet pa Parlamentario Marisol Lopez Tromp, en realidad tabata e lider di MAS cu tabatin e poder ya cu ta Parlamento ta controla y dicidi con gobierno tin cu hiba su maneho pero na mesora e incidente aki ta muestra kico ta totalmente robes cu Parlamento y gobernacion di e pais.

Un gobierno cu tin un mayoria minimo cu pa tristo cu e por zona, ta esun cu ta manda riba parlamento pa motibo cu e tin 11 parlamentario cu a presta nan mes pa permiti nan mes wordo uza na tur momento, den ultimo cinco añanan.

Hendenan cu ta yama nan mes representantenan di pueblo, hendenan cu tin cu para pa loke ta bon, hendenan cu mester tin caracter y sinceridad pero kendenan pa sirbi e poder di nan gobierno, ta simplemente muestra e pio banda di democracia den un pais.

E asunto cu un Parlamentario a bisti un shimis cortico, no por a bira e tema di loke Parlamento tabata tratando, esta un cambio di ley pa exonera un Minister pa erornan cu el a comete den su maneho y cual e tin cu para personalmente responsabel pa esaki.

Henter e comedia ‘tristo’ diaranson siman pasa, caminda tres figura importante den gobernacion di e pais y su democracia, ta bay totalmente for di sla cu nan comportacion contra di un miembro di Parlamento, ta muestra cu principalmente pueblo tin un Presidente di Parlamento cu no sa e diferencia entre e responsabilidad cu e ta cargando of su persona hungando domino bou di palo.

Ta bin acerca c’un Minister den persona di Geoffrey Wever cu su partido ta papia di derechonan igual, semper ta papia den nomber di su partido riba gobernacion di integridad, a sinta participa den e falta di respet aki contra di un miembro di Parlamento.

Pero kisas loke tabata e cos mas pio di tur e badabada aki, tabata miembronan di Parlamento cu ta sostene gobierno, tambe a haya henter e accion di Minister Maduro, algo pret, algo pa hari, tur a costo di un colega di nan den Parlamento.

Cu e mentalidad aki no ta nada straño e situacion dificil cu pueblo di Aruba ta pasando aden, ya cu dirigentenan responsabel pa e pais, no sa e diferencia entre loke ta malo y loke ta bon!

Helicopternan nobo di Wardacosta Caribe Hulandes ta operacional

Wardacosta Caribe Hulandes a cera un contract nobo pa helicopter y a tuma nan den servicio. En conexion cu e contractnan cu a vence fin di aña pasa di e compania di 'lease' Draken, Wardacosta a traha ultimo añanan duro pa cera un contracto nobo pa e helicopternan.

E dos helicopternan tipo Augusta Westland, a base di un contract temporal, a ser entrega pa e compania Bristow Helicopters Limited. cu e contract temporal cu Bristow, Wardacosta tin su capacidad di vuelonan pa su servicio bon segura. Di e dos helicopternan, na e momento aki, uno tin e colonan di Wardacosta, y e otro tin e colonan di e compania Bristow. Medio 2023 ambos helicopter lo tin e colonan di Wardacosta. E helicopternan lo ehersce vuelonan durante e 10 añanan binidero pa Wardacosta.

E tipo di helicopter AW-139, ta keda mescos, tanto den e



contract temporal como den e contract nobo. E censonan di e helicopternan nobo si ta miho. Tambe esunnan nobo tin medionan di comunicacion di calidad halto na bordo y nan ta miho ekipa pa accionnan di buskeda y rescate.

Parlamentario Arthur Dowers

2.1 miyon florin pa Edison Briesen pero ni tin placa pa schoolgeld

Ta for di 2017 caba, pueblo a cera conoci c'un gobierno sin vision, un gobierno sin interes den bienestar di pueblo y un gobierno cu no tin ningun intencion di saca man y yuda tur esunnan cu menos entrada y tur cu ta confrontando problema serio pa cubri gastonan di cas. Parlamentario Arthur Dowers di fraccion di AVP ta muestra cu a haci tanto fanfaria cu e asina yama FASE durante di pandemia, caminda lo mester a yuda principalmente esunnan cu a perde trabou den sector priva pa sobrevivi e periodo aki.

Durante di campaña di 2021, entre otro Minister Glenbert Croes a informa votadonan cu si MEP no bin bek den gobierno, FASE lo disparce pero segun parlamentario Dowers, e minister no a bisa pueblo cu den e proyecto di FASE aki, tambe tin 'friends & family' cu a ricibi FASE contra tur regla existente. "No solamente e asunto di FASE so pero hasta Prome Minister Evelyn a bin dilanti y sigura werksternan cu su gobierno lo regla nan situacion financiero, lo sigura cu nan lo keda cu nan trabou y cu gobierno lo percura pa nan sigui traha.

Nada mas a ser haci, awe werksternan ta cay bou di SKOA cu a dicidi di bay over na aumenta schoolgeld entrante

proximo aña escolar, pa asina cubri gastonan di maneho cu a aumenta formalmente den ultimo añanan. MEP a drenta gobierno y FASE a disparce despues cu hopi caso no corecto a keda detecta y werksternan nunca mas a tende di Evelyn y nan situacion no a wordo aclaria completamente ainda.

Ta ora cu nos scucha e cosnan aki, ora cu analisa e aumento di schoolgeld cu SKOA a anuncia, ta mas cu claro cu pueblo lo haya su mes den mas gasto y cu menos placa pero pa Gabinete Wever Croes II, esaki no ta problema y hasta ta muestra cu pueblo no mester di gobierno su ayudo. Loke ta haci e anuncio di aumento di placa di scol pa SKOA, ta e hecho cu den mesun siman pasa, tambe a bin dilanti e informacion cu gabinete Wever Croes II kier presenta un ley pa exonera ex Minister di MEP, Edison Briesen caminda lo tin cu paga un compania e suma di 2.1 miyon florin.

Si e ley pasa esaki ta nifica cu Briesen kende ta bao di investigacion actualmente, gobierno ta libra su ex minister di paga 2.1 miyon florin y e suma aki ta pueblo lo paga esaki, pues pueblo lo paga pa mal maneho di Minister Briesen durante cu e tabata minister den gabinete Nelson Orlando Oduber.

Pa completa obra, diaranson siman pasa Parlamento a bin hunto pa libra minister Xiomara Maduro di paga un suma riba 200 mil florin pa decisionnan cu el a tuma y cu e no tabatin mag di tuma, loke ta pone su persona mescos cu Briesen, personalmente responsabel pa e debenan aki.

Pues aki pueblo por mira un biaha mas con gobierno di Prome Minister Evelyn ta yuda su hendenan prome cu e yuda pueblo y ta bolbe confirma cu e gobierno di MEP aki, nunca tabatin pueblo na pecho y nunca lo yuda pueblo den e situacion cu e gobierno aki mes a hinca henter e pais aden," Parlamentario Arthur Dowers a declara.

Análisis

Gabinete Wever Croes II falta integridad pa tuma su propio retiro

Historia politico lo bay muestra cu partido MEP lo bira e prome organisacion politico cu ta caba c'un ex colega di coalicion den un periodo di 66 luna na poder.

Mirando e ultimo desaroyonan cu ta tumando luga, e perspectiva pa gabinete Wever Croes II bay e ruta completo di cuater aña, ta uno masha limita mirando desaroyonan politico tumando luga y cu lo sea crea problema serio pa partido MEP of problema fatal pa e partner di coalicion, partido RAIZ.

Un coalicion cu practicamente ya mester a bay cas caba pero e falta di interpretacion di nificacion di e palabra di integridad of character, te ainda no ta ser practica den e forma corecto manera cu pueblo ta spera di e actual gobierno.

Actualmente tin un desaroyo tumando luga cu lo por forma un peligro serio pa principalmente partido RAIZ ya cu cualkier daño politico cu e partidonan di e coalicion aki ser confronta cune, e daño lo ta limita pa e partido grandi di MEP y e lo ta devastador pa e partido chikito di RAIZ.

Ehempel tin suficiente ya cu recientemente, ya cu te cu dos aña pasa, ainda dos partido chikito cu ta POR y RED, tabata forma parti di gobernacion di e pais pero na momento cu lider di MEP a dicidi di cambia rumbo di e partidonan aki, ambos partido a perde tur loke pueblo a duna nan den eleccion di 2017.

POR practicamente ta elimina for di cualkier posibilidad di lo haya representantenan den Parlamento di e pais, mientras cu partido RED ta trahando duro pa recupera tereno perdi bek pero e lo costa mas tempo y mas esfuerzo compara cu e proceso electoral na 2017.

Diabierna ultimo Prome Minister Evelyn Wever Croes a anuncia cu el a dicidi di apela e decision di Corte Superior pa loke ta reconocimiento di matrimonio di pareha di mesun

sexo y cu awor tin cu warda riba decision di Corte di Casacion.

Fraccion di RED den parlamento pero tambe expresion di ambos Minister di RAIZ den gabinete Wever Croes, a pone bon cla cu e partido ta para pa derecho igual pa tur hende caminda hasta e fraccion den Parlamento, hunto cu fraccion di ACCION21 y MAS, dia 16 di December ultimo, a entrega na Presidente di parlamento un concepto di ley pa permiti matrimonio di mesun sexo.

Minister Geoffrey Wever tambe recientemente a muestra cu e topico aki ta un principio di partido RAIZ y cu e partido ta para pa esaki.

Sinembargo diabierna ultimo Prome Minister a anuncia cu gobierno di Aruba ta apela e decision di Corte Superior y a pone e principio di RAIZ un biaha mas un banda pero te cu awe mainta, ainda no a drecha ningun tipo di reaccion di e posicion cu e partido lo tuma awor.

Den fin di siman a tuma luga varios reunion tanto den seno di partido RAIZ pero tambe den seno di coalicion, mirando cu Prome Minister lo trata na convence e lider di RAIZ pa keda den gobierno ya cu e lo ta premira cu Corte di Casacion tambe lo ordena cu e tres islanan di Caribe Hulandes, lo tin cu acepta matrimonio di mesun sexo.

RAIZ a insisti for di momento cu nan a firma e acuerdo di gobernacion cu gobernacion cu integridad ta punto crucial pa e partido pero e situacion crea pa e decision di Prome Minister bay Corte di Casacion, ta mishi cu e punto aki, de lo contrario lo tin cu asumi cu e decision pa bay Corte di Casacion, tambe a conta cu aprobacion den Consejo di Minister di ministernan di RAIZ, esta e lider Ursell Arends y su colega Geoffrey Wever.

Tin un serie di asuntonan cu ya caba RAIZ mester a “kijk door de vingers” den e coalicion aki caminda a cuestiona realmente credibilidad di e partido y su principionan cu supuestamente e ta para pa esakinan pero ta haci net lo contrario. Mirando e experiencia cu partido RED a pasa aden, lo ta bon pa esunnan di RAIZ tuma esaki na consideracion den proximo dianan, ya cu nan lo por “end up” cu man bashi na final di cuenta.

Pobernan lo bira mas pober y hasta bay scol lo bira imposibel

Otro golpi devastador pueblo a ricibi diabierna ultimo, ora cu SKOA oficialmente a informa cu pa proximo año escolar, 'schoolgeld' lo aumenta pa categoria di enseñansa, esta kleuterschool, scol basico y scol MAVO cu lo bay bira sin duda un problema serio pa cantidad di famia riba e isla.

Segun e lista emiti pa SKOA, mayornan cu ta manda nan yiunan kleuterschool, lo tin cu paga 75 florin di aumento y cu e suma ta subi di 175 florin te cu 250 florin pa e año escolar. Muchanan cu ta bay scolnan basico, lo tin cu paga un aumento di 100 florin ya cu si e actual año escolar mayornan tin cu paga 175 florin, pa e proximo temporada di scol nan tin cu paga e suma di 250 florin. Pa mayornan cu tin yiunan bayendo MAVO, nan lo tin cu paga tambe un aumento di 100 florin ya cu e suma pa e periodo escolar actual, cu ta di 250 florin, awor nan tin cu pone 100 florin ariba pa nan yiu por atende scol. No ta rekeri un profesor of hasta un mirado di carta pa bisa cu e aumentonan aki no solamente lo bay hinca hopi mayor den ainda mas problema financiero pero e temor ta grandi cu hopi mucha lo bandona scol y busca algo di haci, principalmente den e grupo cu ta atendiendo MAVO opleiding.

Ainda e institucionnan aki, mescos cu e concepto cu gobierno tin di pueblo, ta kere cu pueblo tin suficiente placa pa cubri tur e sacrificionan cu nan ta ser confronta cu nan practicamente tur dia. Bida a bira caro, inflacion ta sigui subi y pa hopi famia e situacion ta birando sumamente delicado y ta di lamenta cu den un periodo asina cortico, bida di miles di ciudadano a transforma di algo positivo pa un cas yen di duda y yen di pobresa. Placa no ta yega pa cuminda, e no ta yega pa paga awa y coriente tur luna, e no ta yega pa cubri placa di huur por completo pero asina mes awor mayornan tin cu atende cu e aumentonan cu SKOA a decreta pa proximo año escolar.

A papia masha bunita con tin cu spaar, con por cubri e placa aki den un forma mas organisa pero esunnan cu ta duna e conseho aki, nunca a para den cushina cu masha poco pa cushina, no a bay WEB of Elmar pa yega na di tantisimo areglo di pago ya cu placa simplemente no ta yega. Ya caba por mira aumento di hobennan para na cahanan di supermercadonan pa yuda clientenan hiba comestibel pa nan auto, ya cu nan kier haya algo, gana algo extra pa yuda na cas of pa nan mes tin placa, ya cu pa mayornan ya no por duna nan placa pa nan necesidadnan tur siman. Si pone e decision di SKOA den un tipo di perspec-

tiva financiero pa un famia cu tin tres yiu bayendo scol, esaki ta nifica un aumento di 300 florin cu ta HOPI placa y ainda ta bin acerca cu tin cu compra uniform di scol, tin cu paga aircogeld cu ta costa 150 florin.

Un famia cu tin tres yiu bayendo scol, uno den kleuter, uno den basis y otro den MAVO, lo tin cu paga un suma astronomico di 875 florin y riba dje mester pone ainda aircogeld pa tur tres cu lo ta di 450 florin lo ta nifica cu e famia di tres yiu aki, lo tin un gasto di 1325 florin pa proximo año escolar.

Educacion ta importante pero na momento cu no tin placa of cu tin mester di e placa aki pa cubri otro necesidadnan den cas, ta mas cu claro cu un di e yiunan aki lo bandona scol, lo busca algo pa haci pa yuda cu gastonan di cas loke lo ta algo hopi cruel.

SKOA ya caba a mostra cu tur promesa haci pa Prome Minister Evelyn Wever Croes, no a wordo cumpli y hasta gobierno a laga werksternan na scolnan cay loke a pone e peso di e gasto aki riba lomba di SKOA.

Hopi ta mira cu e anuncio oficial di SKOA lo ta apenas e comienso di un desaroyo menos atentado pa pueblo financieramente y cu cos lo sigui empeora formalmente.

BUCUTI & TARA
BEACH RESORT · ARUBA

Elements
RESTAURANT

**IF YOU ARE A PASSIONATE HOSPITALITY PROFESSIONAL,
EAGER TO JOIN A WINNING TEAM,
TOP 25 RESORTS IN THE WORLD ON TRIPADVISOR,
ALSO THE FIRST CARBON NEUTRAL RESORT IN THE CARIBBEAN**

WE'RE LOOKING FOR YOU

F&B SUPERVISOR	CONCIERGE/ FRONT DESK AGENT FLUENT IN ITALIAN AND/OR GERMAN	ENGINEERING SUPERVISOR
SOUS CHEF	LUNCH SERVER	TECHNICIAN
COOK/ COOK HELPER	BREAKFAST SERVER	ENGINEERING ADMINISTRATOR (PART-TIME)
BARTENDER		HOUSEMAN

EXCELLENT BENEFITS

- ATTRACTIVE SALARIES WITH BONUS OPPORTUNITIES
- 5-DAY WORKWEEK
- UP TO 27 VACATION DAYS (BASED ON YEARS OF SERVICE)
- HEALTH DISABILITIES AND LIFE INSURANCE
- DENTAL AND VISION INSURANCES
- SAVINGS & LOANS PROGRAM
- EMPLOYEE DISCOUNT AT TARA ECO SUPPLIES AND MAJOR LOCAL SUPERMARKET

APPLY ONLINE AT WWW.BUCUTI.COM/CAREERS



Mirrors Beauty Academy ta ofrece e siguiente servicionan

Laba
Corta
Blowdry
Keratina
Cold Wax

Tinja
Highlights / Mechitas
Ombre / Californiana
Bayalage
Peinado

Makeup
Threading
Barberia
Manicure
Pedicure

Y
mucho
mas!

Tel. Alejandro: 564-4412 of 582-0110 • Whatsapp: 732-0110 of 566-0110 • Adres: Ponton 76 - Suite #3

Turista burachi y vulgar tawata grita cu su parti intimo afo den lobby



Dia Domingo den careda di mey anochi personal di un hotel high rise a pidi presencia di polis pa un turista burachi y vulgar. E problema a surgi despues cu e turista aki a bebe masha hopi den e hotel y na final no kier a paga y asina e problema e start. Despues di basta rato papia y sin resultado e tur a cuminsa falta respet, papiando palabra malo. Esey no tawata tur e la haya mas mal trip ainda ora cu e la bay den lobby di e hotel y ta saca su parti intimo y orina. Eynan no tawata tin nada mas cu mester a pidi asistencia di polis.

Na yegada di polis un gritamento y mesora a bay over na detene e homber y pone plat den boei. Transportwagen a wordo pidi pa hiba e homber aki warda, unda cu e lo bay haya un cel pa e sosega su curpa.

Alcohol ta keda un problema Chauffeur burachi a ocasiona boksmento



Dia Domingo marduga den careda di 3'or patruya di districto di Noord a bin topa un boksmento na altura di Citgo Palm Beach. Mesora polis a para nan auto pa asina baha controla si tur cos ta na ordo. Agentenan mesora si a pone tino cu un di e chauffeurnan lo por a bebe di mas, y pa mas sigur a bay haci un alcohol test cu ne. Manera nan a sospecha, e chauffeur di e Subaru a pasa e limite stipula y despues di bise su derechonan e la wordo deteni y hiba warda. E boksmento a sosode momento cu e Kia Optima para pa bira na su man robes a haye confronta cu e Subaru biniendo for di pariba a bin dal contra dje. Daño material ta minimal.

PAN BATI, SCABECHI, SEAFOOD SALAD, SULZ, SANGER YENA, CONCOMBER OF PAPAYA STOBA, SANCOCHO, AWA DI PLAYA, QUESILLO, PANBOYO, BOLO PRETO AND MUCH MORE!

**AUTHENTIC
ARUBAN &
CARIBBEAN
BUFFET**

Elements
RESTAURANT

LOCATED AT BUCUTI
& TARA BEACH RESORT
RESERVATIONS REQUIRED

elementsaruba.com | +297 592 5868
ADULTS ONLY | CASHLESS | NO SMOKING | NO GROUPS

\$24.50

SERVICE CHARGE
INCLUDED

Toyota Vitz a cay parcialmente den greppel na Hato

Diadomingo atardi algo pasa di 3'or polis a bay HATO pa un auto cu a bolter y lo ta strobando salida di un cas. Na yegada di polis, no tawata tin ningun auto cu a bolter. Si nan a bin topa un Toyota Vitz, cu lo a bay pasa ariba un brug chikito y cay banda links den e greppel. Na yegada di polis e chauffeur no tawata na e sitio, pero si compania di seguro. A pidi pa un takelwagen pa move e auto cu door di e manera cu e la keda e tawata stroba pasada pa otro autonan.



Brandweer a sali pa candela den restaurant di high rise hotel



Diadomingo merdia den careda di 2'or alarma a wordo bati pa hopi huma saliendo di un restaurant di high rise hotel. A pidi Brandweer cu urgencia, unda cu mesora a saca dos unidad. Segun informacion, basta huma tawata saliendo of a cuminsa sali for di e restaurant situa den banda zuid di e hotel cerca di Moomba. Na yegada di e prome unidad ya no tawata tin ni huma of candela.



Locual a sosode

Brandweer a wordo informa cu e "candela" lo a cuminsa unda cu galiña (roisserie) ta wordo haci. Eynan aparentemente vet lo a pega den e hood cu lo por a causa cu esaki a cuminsa saca hopi huma. Pero, debi na e sistema di candela di dicho hotel a activa y mesora awa a Sali (sprinklers) paga loke sea tawata na candela. Asina por mira cu e sistema contra candela di e restaurant ta trahando optimalmente.

Parlamentario Marco Berlis (MEP):

Preguntanan na Minister Ursell Arends riba investigacion di Serlimar

Recientemente mi a manda un serie di preguntanan na minister Ursell Arends tocante di e progreso di e investigacion forensico cu ta tumando luga den Serlimar. Mi preguntanan a surgi basa riba un mocion di sr. Raymond Kamperveen, cual a urgi gobierno di Aruba pa presenta na Parlamento di Aruba, e resultado di e investigacion na Serlimar, no mas tarda cu 31 di Januari. Esaki no ta e prome biaha cu Parlamento a puntra minister Ursell Arends pa e status di e investigacion famoso aki cu ta tumando luga. Na 2021 Minister Arends a indica cu esaki lo keda cla pa December 2021, pero ora e fecha a yega, esaki no tabata e caso. Durante otro reunionnan publico e pregunta aki ta keda bini dilanti. Te ainda ni Parlamento ni pueblo a haya un contesta ni tampoco e motibo pakico e investigacion forensico aki ta tumando asina hopi tempo.

Dicon e investigacion forensico aki ta importante? E ta importante pa hopi motibo mes. Nos tur ta corda con famoso Serlimar a bira ora cu partido POR a expresa su desconfianza den su propio minister di Infraestructura sra. Marisol Lopez-Tromp, cual nan a purba retira tambe despues atraves di un mocion di desconfianza. Un problema interno di POR a bira e problema di coalicion, cu despues ministerraad a haye ta kita Marisol di trabao.

Ta durante e “show politico” di Marisol, e famoso termino “spiritonan” a bin dilanti y pa hopi anochi Marisol a postula su mes como un persona contra corrupcion y di kier para pa integridad. Di e tempo aya ta papia di un “investigacion” den Serlimar caba y cu lo ta andando. Awor, e investigacion



aki a wordo amplia pa asina gobierno por tin un miho bista kico tur a sucede eyden. Den e sala di Staten por a scucha gritonan di fraude, corrupcion, hende cu ta cobra sin traha y mucho mas. Esaki ta e motibo pakico Parlamento y sigur mi persona ta urgi minister Arends pa contesta Parlamento y informa nos riba e status di e investigacion aki.

Den cuadro di tur esaki mi a haci minister Arends 10 pregunta tocante e progreso di investigacion aki. Un investigacion cu Marisol a bisa cu e “no kier pa Parlamento haya den su man.” MAS a vota na januari contra pa Parlamento haya e investigacion aki den su man! Kico a pasa cu Marisol?

Kico Marisol tin di sconde? Di berdad e rapport forensico aki lo produci evidencia of evidencia di mentiranan di Marisol? Ban wak! Marisol y Gunn a expresa cu nan ta contra pa Parlamento haya e investigacion riba e ultimo dia di tratamiento di presupuesto 2023!

Esaki ta algun di e preguntanan cu mi a haci minister:

Minister por duna un fecha definitivo ki dia Parlamento lo haya e rapport di e investigacion aki den su man manera e mocion aproba aki ta urgi gobierno?

Mirando cu den e mocion tin diferente punto di mal maneho, fraude y falta di Good Corporate Governance entre otro, Minister por duna algun detayes, cifranan y datos caba na Parlamento di kico exactamente ta pasando na Serlimar?

Minister mirando cu den pasado un ex minister Marisol Lopez Tromp encarga cu Serlimar supuestamente a laga investiga Serlimar na 2020, y awor recientemente durante di tratamento di Presupuesto 2023 a vota contra e mocion aki pa Parlamento haya e rapport aki den su man, minister por duna Parlamento algun informacion si enberdad tabata tin e supuesto “spiritonan” aki den Serlimar?

Eric Ras (Lider di partido Curpa):

Gobierno ta apela decision di corte superior cu e unico meta pa alarga bida di gobierno

Por fin gobierno a tuma su posicion y anuncia cu ta apela decision di corte superior y lo bay corte di casacion. Kico lo por ta consecuencia di e paso aki? E lo por ta motibo pa Raiz, cu ta pro matrimonio di mesun sexo, bandona gobernacion? Parce cu minister-president a logra convence Raiz cu MEP ta di acuerdo cu matrimonio di mesun sexo, pero cu mester ta cauteloso den ki forma mester incorpora e ley sin perde apoyo di e pueblo votado. Pa logra e metanan aki minister-president a haci uzo di diferente argumento contradictorio. Di un banda minister-president ta declara cu mester apela e decision di corte superior paso hues a bay sinti riba stoel di parlamento, pero den e mesun rosea minister-president ta bisa cu nos constitucion no ta permiti discriminacion. E concepto di ley ta basta avansa caba segun minister president y ora e ley aki wordo trata den nos Parlamento e lo wordo aproba sin ningun problema. Locual cu minister president a haci ta busca moda di keda bon cu tur hende. Mañan e por bisa no ta ami sino ta Parlamento. Na final di cuenta cu e acto aki minister president ta tene Raiz contento y simplemente ta prolonga bida di su gobierno.

Unanimamente sentencia di corte di derecho humano na Strasbourg Francia a establece un veredicto cu matrimonio di mesun sexo no ta un derecho. E ta e corte mas importante pa locual ta trata derecho humano. Gobierno no por sconde tras di derecho humano sino ta parti di e acuerdo cu gobierno a firma cu e metanan di desaroyo sostenibel cu bao punta 5 ta papia di derecho igual. E 47 huesnan unanimamente den corte di derecho humano a bisa bon cla cu e no ta un derecho. Locual cu gobierno ta sconde su tras ta hinca den e acuerdo cu gobierno a firma cu ta encera e 17 puntonan di desaroyo sostenibel bao punto 5 cu ta bisa derecho di igualdad. Gobierno ta kere cu pueblo ta bobo y ta bisa cu e ta discriminatorio. Un mentira flagrante. E acuerdo firma dia 17 di December 2020 cu e CommonTrust Network di World Economic Forum ta pa introduci e paspoort digital caminda pueblo lo perde tur privacidad. E prome isla den Caribe cu lo mester bira e modelo di World Economic Forum. E lema di World Economic Forum ta: “lo bo no tin nada y lo bo ta feliz”. Nos di partido Curpa lo bringa e agenda aki sigur paso nos no ta catibo.

Situacion a cuminsa cambia na Europa y e pueblo di paisnan Europeo no ta acepta e 17 puntonan di desaroyo sostenibel paso na final nan lo perde tur nan derecho y libertad. Ta bon pa pueblo di Aruba ta bon informa unda e gobierno kier

hiba nos. E agenda di e anticristo lo fracasa sigur y nos por mira cu poco poco pero sigur e gobiernonan comunista aki ta wordo derota. Nos aki na Aruba tambe ta kere cu e gobierno aki ta den ansha di morto y su fin lo yega sigur. Dios su tempo ta perfecto.

Locual cu Parlamento mester haci ta no mira e caso cu a bay dilanti corte caba. E casonan ey ta yegando nan fin. Den e gobierno aki tin yen di caso castigabel pa ley cu e parlamentarionan ta yuda gobierno tapa enbes di pidi un investigacion penal y e casonan dudoso ta conoci. Ibis, Avestruz y flamingo ta pasado. Awor nos lo mira si e parlamentarionan cu ta bisa di ta Cristian lo para pa principio paso si nan ta consciente di e contenido di e agenda 2030 hopi tempo caba nan lo a bandona e partido cu nan ta sostene den gobierno y tambe e ley di matrimonio di mesun sexo ta basta avansa caba. Partido Curpa ta e unico partido di famia cu lo sigui spierta pueblo di e berdad. Nos por mira cu na horizonte tin un luz. Pueblo di Aruba e unico partido politico cu por reforma nos Aruba dushi tera ta partido Curpa. Cu partido Curpa den gobierno lo tin cambio sigur.

The advertisement is a collage of images showcasing various products from Todomar Aruba. At the top left, under the heading 'APPAREL', there are images of a red baseball cap, a blue long-sleeved shirt, and a pair of sunglasses. To the right, under 'BOAT ACCESSORIES', there are images of a boat's interior, including a dashboard and a control panel. In the center, the 'TODOMAR' logo is prominently displayed in a stylized blue font. Below the logo, there are social media handles for Facebook, Twitter, and Instagram, all listed as 'TodomarAruba', along with a phone number '+297 585 0555'. At the bottom left, under 'FISHING TACKLE', there are images of fishing gear, including a fishing reel and a fishing lure. At the bottom right, under 'FIBERGLASS PRODUCTS', there are images of various fiberglass products, including a bucket of 'MOLD RELEASE' and several bottles of 'FIBERGLASS' products.

RAIZ no a dal ni un paso atras den su compromiso y determinacion pa realisa igualdad

Cada persona ta diferente, y ta nos diferencianan ta haci nos desaroyo posibel

GOBIERNO LO TUMA E PASO PA BAY CASSATIE MIENTRAS DEN PARLAMENTO RAIZ, ACCION21 Y MAS LO DEFENDE E LEY DI INICIATIVA DEN PARLAMENTO



Contrario na loke ta wordo asumi y insinua, e decision di Gobierno pa bay den casacion NO ta significa cu RAIZ ta contra matrimonio entre pareha di mesun sexo. E conclusion aki ta basa riba sea falta di informacion, of un agenda politico. Dentro di algun luna Parlamento lo trata e ley di iniciativa pa legalisa matrimonio entre pareha di mesun sexo. Parlamentario Misha Raymond di RAIZ a contribui activamente y ta cofirmante di e iniciativa di ley aki (Accion 21, RAIZ, MAS).

Esnan cu lesa e veredicto di Corte Comun di 6 di december 2022 por distingui e dos aspectonan principal di e veredicto:

1. Exclusion di matrimonio pa parehanan di mesun sexo ta discriminatorio a base di articulo 1 di nos Constitucion;
2. Corte ta dicta cu tur pareha di mesun sexo por casa y cierto articulo di nos leynan cu ta exclui parehanan di mesun sexo di por casa no por wordo aplica. Ademas ta ordena ambtenaarnan di Censo pa coopera pa persona di mesun sexo casa.

E conseho cu Gobierno a ricibi riba e veredicto, ta cu punto 2, esta cu Corte a bay sinta riba stoel di Gobierno y Parlamento, ta cuestionabel y un base pa bay den casacion. E punto di Corte Comun cu exclusion di matrimonio pa parehanan di mesun sexo ta discriminatorio a base di articulo 1 di nos Constitucion, no lo wordo cuestiona.

RAIZ ta consciente di e posibel consecuncianan di casacion y nos ta prepara pa tur escenario. Teniendo cuenta cu e proceso hudicial, democracia y respet pa otro, RAIZ ta tuma

pasonan responsabel pa logra e meta di igualdad, hasta ora e bira dificil. Mientrastanto tratamiento di e ley di iniciativa no por warda riba un decision den casacion. Dentro di poco Parlamento lo trata e ley.

Compromiso

RAIZ su compromiso y determinacion pa igualdad no a cambia. Esnan cu ta sigui e desaroyonan riba e tema aki lo compronde pakico RAIZ ta demostra tolerancia. Nos no tin ni kier tin e luho pa tuma un postura dictatorial, simplifica asuntonan mas complica y tuma decisionnan irresponsabel, perdiendo bista di e meta y e bigger picture ora ta goberna un pais.

Pa logra legalisa matrimonio entre pareha di mesun sexo na un forma responsabel, parlamentario Misha Raymond di Fraccion di RAIZ a contribui activamente y ta cofirmante di e iniciativa di ley cu parlamentario Miguel Mansur (Accion 21) a inicia, y Marisol Lopez-Tromp (MAS) y Aquanette Gunn (MAS) tambe a firma. E proceso di legislacion pa e ley di iniciativa ta den un estado avansa.

Bo por conta cu RAIZ lo defende y argumenta nos sosten pa e ley y su meta na un forma responsabel y cu respet pa otro. Insinuacionnan erroneo no lo cambia nos determinacion y compromiso pa logra e meta.

Por favor Adopta mi

CAT Adoption DAY
March 4, 2023
BESTIAL PET SHOP
TANKI FLIP 119, LOK I
10AM-4PM

- MUST BE INSIDE CAT
- ADOPTION FEE AFL 75,- (INCLUDES STERELIZATION AND 1 X FLEA TREATMENT)
- CAT LITTER BOX TRAINED

Nine Lives ARUBA

BESTIAL

Parlamentario Ricky Hoek (MEP):

Silencio na paleis

Na un manera scondi y keto keto ex-minister Paul Croes a bay entrega su mes mainta trempan riba diamars ultimo na porta di KIA relaciona cu e condena cu el a ricibi for di corte di casacion. Bou di e nomber 'Caso Ibis' e ex-minister a ricibi un condena di 3 aña di prison pa motibo di corrupcion y soborno durante di su funcion como minister.

Caso Diamante ta trata di ex-parlamentario señor Alan Howell, caminda cu e lo a malversa y comete fraude cu placa di su fraccion. Esaki ta un suma cu tur fraccion ta ricibi pa por funciona optimalmente durante un aña parlamentario. Interesante ta, cu den e caso aki, señora Marisol Lopez-Tromp, ex-miembro di fraccion di POR, tambe ta ser menciona di a ricibi un suma di 25 mil florin for di e placa di fraccion. Remarcabel ta, cu sra. Lopez-Tromp no a ser acusa oficialmente di ta un sospechoso den e caso Diamante, pero su mes persona no a desmenti esaki tampoco.

Si nos kier papia di e caso di corrupcion mas grandi y escandaloso den e historia di politica na Aruba anto nos ta papia di **Caso Avestruz**. Un acto di corrupcion caminda parlamentario y ex-minister Benny Sevinger a duna su amigonan y familiarnan miles di meter cuadra di tereno publico y placa a cambio di fabornan personal. Caso avestruz tin un cantidad grandi di personanan involucra, tanto comerciante y como di sector publico. Pronto lo sigui elabora riba e caso aki, mirando cu dia 14 di april proximo e sentencia lo cay.

Caso Kukwisa ta relata na parlamentario y ex-minister Marisol Lopez-Tromp. Un politico cu hopi aña di experiencia y cu conoce e sistema politico 'door en door', pero sinembargo ta scoge pa sconde tras di excusanan y mantene un silencio profundo pa no papia di corrupcion. E tambe ta un 'sospechoso' den caso di corrupcion caminda e tambe a kita tereno for di un ciudadano y duna esaki na un otro pa ganashi politico. Tambe el a duna permiso di expansion na cierto comerciante den un tempo record sin tene cuenta cu e proceso stipula pa ley. Tempo e tawata minister DIP tawata fantastic, awo cu e no ta minister mas e ta pidi pa cera DIP. Logico, pasobra esey ta e departamento unda tur e irregularidadnan a sosode y awo e kier dek su mes.

Ta bay cuestiona of ta sigui hunga ciego?

E pregunta cardinal ta awor, kico oposicion ta warda pa cuestiona e casonan aki? Nos por mira cu coalicion di oposicion di AVP, Accion21 y MAS lidera pa Mike Eman a cuestiona abiertamente e casonan di Arubahuis y ex-minister Eddie



Briesen. Pero desde cu e casonan Ibis, Avestruz, Diamante y Kukwisa ni UN di e parlamentarionan di dicho partidonan den oposicion a sali y bisa publicamente cu nan ta contra di corrupcion. Al contrario nan ta sinta bandi Benny reunion tras di reunion.

Ta yen di excusa nan a uza, cu mester warda pa wak si nan ta sospechoso of no, cu mester warda e caso bin dilanti, cu mester warda sentencia, en fin. Tur cos a pasa, hasta colega Paul a entrega su mes na KIA y ainda nan no a sali bisa nada. Oposicion falta curashi, sinceridad y sentido di responsabilidad pa traha na bienestar general di pueblo. No tin duda cu nan ta brasa corrupcion, manipula y gaña pueblo pa yega bek na poder. Di e forma aki nan por elimina tur caso riba nan nomber, haci manera cu nada no a pasa, sigui manipula pueblo y pa sigui haci nan mes y nan amigo- y famianan rico riba custia di pueblo.



Directora di UNICEF Hulanda ta duna compliment di e trabounan cu e team di CdP di DMH a haci



Recientemente representante di Departamento di Mucha y Hoben (DMH), Sue-Ann Ras hunto cu directora di UNICEF di Hulanda, Suzanne Laszlo y Anna Kroon, Senior Specialist Kinderrechten Cariben, a reuni cu Minister Rocco Tjon, unda a elabora riba algun punto importante, relaciona cu e MoU firma dia 22 di februari 2022 y tin un duracion te 31 december 2025.

Colaboracion Actual cu Ministerio

Directora di UNICEF a duna compliment na Minister y e team cu ta encarga cu implementacion diCodigo di Proteccion, riba e tremendo progreso y desaroyo desde inicio y a resalta e pasion y determinacion cu e team aki tin relaciona cu e tema; abuso di mucha. Minister na su lugha a puntra si tin posibilidad pa extende e MoU y segun directora Laszlo cu esaki ta poco trempan pa tuma decision riba dje y ta depende tambe di e disponibilidad di fondo na e momento ey. Pa awor e plannan t'ey pa loke ta sigui duna sosten tecnico pa e siguiente pasonan diCodigo di Proteccion.

Desaroya un "Toolkit" y Revista Digital contextualisa

For di 2022 a ranca sali cu un plan di accion relaciona cu e fondonan cu Aruba a haya for di Union Europeo pa algun proyecto bou auspicio di UNICEF Hulanda. Pa loke ta trata e parti di fondo y trabou diCodigo di Proteccion (CdP), por bisa cu e trabounan ta kedando cla.

Pa garantisar continuacion como tambe durabilidad relaciona

cu e decreto nacionalCodigo di Proteccion den e casonan di (sospecho di) abuso di mucha na Aruba, tin un grupo di profesional den e 4 sectornan: social, husticia, enseñansa y salud cu a traha riba e contenido di un Toolkit DigitalCodigo di Proteccion. E meta di e Toolkit Digital CdP aki ta, pa tur e profesionalnan den e 4 sectornan por educa y informan nan mes riba diferente tema relaciona cu abuso/maltrato di mucha.

E grupo meta ta e profesionalnan cu ta traha cu of pa mucha na Aruba y ta traha cuCodigo di Proteccion. E prome version di concepto di e 'Toolkit' ta cla y actualmente ta trahando riba e traduccion y algun detaye relaciona cu e contenido y idioma. E desaroyo di e 'Toolkit' como tambe e revista digital ta den colaboracion y partnership estrecho cu Augeo Foundation y Departamento di Mucha y Hoben (DMH). A haci uzo di nos profesionalnan local pa crea henter e contenido, incluyendo topico, escritor y potret of video. Tur esaki ta pa brinda sosten profesional na e propio profesionalnan den veld, na momento cu nan mester traha y anda cuCodigo di Proteccion como parti di nan maneho diario.

UNICEF ta vigila e proceso di desaroyo di Toolkit y Revista digital hopi di cerca, mirando cu nan a contribui pa Aruba yega na e fondonan necesario via di Union Europeo y Postcode Lotterij, pa ehecuta e productonan aki pa engrandec e conscientisacion y comparti conocimiento profesional.

Acogida grandi pa encuesta ‘Bida literario na Aruba’

Recientemente e comision cu ta guia e investigacion encunanto e Bida Literario na Aruba a reuni pa trata diferente puntonan di interes. E investigacion aki ta cubri diferente areanan, manera e.o.: scolnan secundario, biblioteca, libreria, autornan y e lesado. Pa cada area e investigado sr. Nicolaas a diseña un lista di pregunta, specificamente dirigi riba nan tereno, pa contesta. A base di e contestanan aki por haya un miho idea cua ta e motibonan cu tin e Bida literario tranca y kico lo mester haci pa mehora esaki.

E comision aki consistiendo di dr. J. Pereira, dr. W. Rutgers y dr. F. Guadeloupe a revisa tur e encuestanan y duna nan recomendacion. E entusiasmo den comunidad pa participa na e encuesta aki ta hopi grandi. Esaki ta keda ilustra pa e cantidad di personanan cu ta registra nan e-mail via survey.literatura@gmail.com pa ricibi e encuesta. Proximamente lo aparece riba diferente website, manera e.o. di Fd. Lanta Papiamento (FLP) y di Career IQ, unda bo por djis primi riba e boton, anto e encuesta ta habri pa asina por yena esaki y na final manda bo contestanan aden.

Den pasado hopi a ser papia y insinua tocante e bida literario na Aruba, pero no ta tin datos pa substancia e ponenci-



anan aki. Tin hopi factornan cu ta hunga un papel den esaki y cu mester tene cuenta cu ne. Pues hopi ta esnan cu tabata pensa algo y bisa esaki, mientras nunca por a comproba esaki. Pero awor cu e investigacion aki, si ta bira posibel pa pone e dede riba e herida y busca un remedi p’e. E investigacion aki – segun sr. Nicolaas – ta e prome den su sorto y ta algo cu lo mester ripiti cada decada of cada cinco año. Asina’ki lo por sigui monitorea e tereno aki y por construi un pais sano y fuerte.

Invitacion

Retiro di Cuaresma 2023 na Parokia Birgen di Fatima Dakota

Reverendo Pastoor Jozef Pelc, Reverendo Diacono Michael Nicolaas y Area Union y Comunión ta invita tur parokiano y pueblo di Aruba en general pa asisti na e Retiro di Cuaresma 2023.

Fecha: Diasabra 4 maart 2023.

Luga: Misa Birgen di Fatima Dakota.

Orador: Pader Juancho Pilongo.

Tema: Con pa mantene nos fe firme den e tempo di tribulacion aki.

Idioma: Papiamento.

Orario: 9.45am – 1.00pm.

Durante retiro ta pasa collect pa yuda cu gasto. Laga nos ta generoso y contribui. Un suplica pa por fabor desayuna na cas.

Nos kier anima boso pa ta presente.

Preparacion pa cuaresma ta hopi importante. Danki na yudansa di Spirito Santo, comprendemento di tanto e realidadnan como e palabranan di herencia di fe por crece den bida di Iglesia. Laga nos saca bon probecho durante e temporada aki “ora creyente, pa medio di contemplacion y estudio ta warda e cosnan aki den su curason”.

E diasabra aki ta prome diasabra di luna di maart y nos ta cuminsa cu Santo Rosario pa 7.15am den 5 idioma sigui pa S.S. di Misa pa 8’or. S.S. di Misa anochi 7’or ta sigui manera custumber cu Santo Rosario pa 6.20pm.

Diabierna 3 maart ta prome diabierna di luna cu Santo Rosario pa 5.45 atardi, sigui pa Caminda di Cruz pa 6.30pm. Nos ta resa e dia aki for di buki di Pastoor Jacq Janssen. 7’or S.S. di Misa cu Rosario di Divino Misericordia canta, Adoracion y Exposicion di Santisimo.

Tarifa di gasolin, diesel, electricidad y awa ta subi

WILLEMSTAD – Entrante diamars 28 di februari 2023 e tarifa regula di gasolin y diesel ta subi na Corsou. Tambe e tarifa di electricidad y awa ta subi entrante diaranson 1 di maart 2023.

Esaki Bureau Telecommunicatie en Post (BT&P) ta participa den su comunicado mensual riba e particularidad aki. BT&P ta supervisa e desaroyo di prijs di productonan petrolero y di utilidad.

Aprobacion y fihamento BT&P ta acesora Consejo di Minister (KdM) encuanto e tarifanan nobo. Solamente despues cu e Consejo di Minister aproba e proposicion, e Minister pa Desaroyo Economico cu ta encarga cu asuntonan di energia, ta fiha e tarifanan. Eseyan ta e tarifanan maximo cu por uza un luna largo. Cu e procedura aki, cu ta considera factornan internacional y local, e supervisor BT&P ta vigila e entrega di combustibel, awa



y electricidad na e poblacion local di forma independiente y transparente, pa esaki ta continuo y rasonabel.

Condena pa duo femenino cu hopi curashi, nan ta huur auto caba bende nan bay gol

WILLEMSTAD - Diabierna corte a dicta sentencia den e caso di un pareha femenino cancan di curashi, kendenan a hacie un custumber pa huur auto, caba pone esakinan na benta. Ta trata aki di J.N.C di 25 aña di edad y I.M di 21 aña di. E duo aki tabata den sala di corte diabierna atrobe, pero e biaha aki pa scucha e sentencia relaciona cu e 12 acusacionnan cu tabatin contra nan, cu ta un combinacion di ladroncia di auto, labamento di placa pa medio di e vehiculonan horta y estafa. Den sala di corte tabatin dia 3 di februari ultimo un escena casi hamas bisto, caminda e duo algun biaha a tripi expresa cu no tin ningun prueba contra nan y tabata comunica como si fuera 'out of this world' pa nan forma di pensa y interpreta nan hazañanan, 'zonder berouw'.

Den sala di corte diabierna atrobe, e parti reserva pa publico sinta, tabata carga pa victimanan di e duo ariba menciona su actonan. Ta hendenan cu sea nan a tuma placa for di dje riba e promesa cu nan lo haya e auto of hendenan cu e duo a kita vehiculo for di nan (bou di e pretexto di ta hur), anto pone e vehiculo(nan) na benta.

Manera ta conoci J.N.C y I.M tabata pasa na diferente empresa aki na Corsou huur auto core bay bin. Nan ta paga cash y ta bisa cu nan a bini na nomber di un otro persona. Ora cu e momento di entrega e vehiculo bek yega nan por dicidi cu ta presenta pa prolonga huur y bolbe paga pa continua cu e huur di e auto of nan ta dicidi cu no ta laga mira nan cara nunca mas.

Den e cuadro aki nan ta haci uzo di medionan social (Internet) pa duna publicidad di e benta. Pues ta e manera pa propaga e autonan aki cu en realidad simplemente bisa ta horta. Na

momento cu un of mas persona demostra interes, e duo mes ta presenta cerca e interesado(nan) en cuestion, pidi pa duna un suma na man pa por haya e vehiculo. Natural nan no por pasa e autonan over riba nomber di e 'doñonan' nobo.

Pero pa esey e duo a inventa un triki, bisando e cumpradonan, cu un ruman cu ta esun doño di e auto ta cera, pero cu pronto nan lo handle e traspaso di e auto oficialmente. Enfin, e autonan despues ta subi caya, maneha pa otro persona, te cu e doñonan di berdad a señala nan vehiculo na un of mas sitio. Enfin polis a start un persecucion, coriendo nan tras y a logra gara nan.

Enfin, pa duna un bista di e magnitud di loke e duo aki a comete mester bisa cu nan a keda acusa di -malversacion, - di estafa, -labamento di placa di benta di e autonan. E siguiente sumanan di peticion pa daño y perhuicio a keda entrega -famia Martina Nfl 4500,—, -famia Sintjago Nafl 4900, -famia G.R Nafl. 6500,—, -famia R. D Nafl. 4000, —, -famia Z.C Nafl. 6500,—, -famia Molina Nafl 2188,78.

Un di e acusadonan tin un pasado cu husticia caba, na aña 2020 el a cay cera pa e mesun asunto aki, esta bendemento di auto di otro hende. Fiscal mr. J. Niks a demanda un castigo di prizon di 48 luna pa J.N.C, kitando e periodo cu esaki a pasa caba den aresto preventivo. Pero pa e acusado I.M fiscal a demanda un castigo di prizon di 40 luna di cua 10 condicional y un periodo di prueba di 3 aña. Placanan cu C tabatin den su poder ta keda confisca, siendo M ta haya algun placa bek. Hues a dicta e siguiente sentencia pa J.N.C un castigo di prizon di 24 luna. E acusado I.M a ricibi un castigo di prizon di 18 luna

Acusado F.G (di DOW) hasta a bay cana laga M.I. mira e tereno

Sentencia lo ta 17 di maart pa 13.30or

WILLEMSTAD - Remarcabel ta e hecho cu siendo cu F.G tabata sa masha bon cu e tereno ta pertenece na e ciudadano 'V', tog el a bay cu M.I cana riba e tereno duna henter un show pa mira si M.I ta satisfecho cu e tereno cu el a priminti'e. Tambe a bini padilanti cu e acusado F.G. a yega di hiba un combersacion cu e doño real di e tereno na Groot Sint Joris. Mas aleu a sali na cla cu M.I tabata un ciudadano cu problema di divorcio y cu via un otro conoci, F.G a bini den contacto cu M.I pa mira si por resolve esaki su necesidad pa logra un tereno. E conoci aparentemente a djis introduci M.I cerca F.G pa dje hala patras, lagando tur cos den man di F.G. Pero hues mr. G. Verbeek claramente a tuma tur su tempo profundisando den loke a pasa. Tratamento di e caso tabata programa pa cuminsa mita di 9, pero pa cuarto pasa di 10 ainda tratamiento di e caso tabata andando. Na cierto momento e hues a puntra F.G si e ta di acuerdo cu el a actua robes. Pero na e momento ey en realidad a sigui henter un historia, caminda F.G. mas bien a splica di su bon intencionnan pa yuda M.I.

Hues mr. Verbeek cada biaha tabata cita for di e relatonan di e interrogacionnan haci cerca polis y cu regularidad e hues a sigui indica cu F.G a bolbe cambia su declaracion, compara cu loke el a bisa polisnan. Pa su defensa F.G tabatin abogado

mr. Adelbert Rooijer, pero natural e abogado su situacion no tabata nada facil, mirando e hecho con largo F.G a keda na palabra, contestando e tantisimo preguntanan cu hues a haci, cobando hopi profundo den e suceso. Na su manera abogado Adelbert Rooijer a trata na crea comprension pa su cliente, demostrando claramente cu aki ningun momento so no ta trata di un ciudadano di mala fe. E ciudadano F.G. en realidad ta un ciudadano cu a sirbi pueblo di Corsou cu trabounan boluntario valioso den bario y na hopi otro ocasion.

Fiscal señora mr. Ter Borg, kende a hiba palabra na nomber di Ministerio Publico y a conclui cu e acusacionnan contra e trahado di DOW, F.G ta legalmente y convincentemente proba. Hopi ferfelo tabata e observacion di fiscal Ter Borg cu mas ciudadano a bisa cu durante aña 2013 nan a pasa den un mesun tipo di experiencia cu F.G., pero cu nan a prefera pa no haci denuncia. E demanda di fiscal pa F.G a encera lo siguiente. Fiscal a bisa hues cu e no ta haya cu F.G mester perde su trabou, pa duna e acusado 9 luna di prizon condicional y 240 ora di trabou. Fiscal a bisa cu e ta tuma e acusado hopi na malo paso e no muestra niun remordimento, ningun 'berouw'. Hues lo duna sentencia den e caso aki riba 17 di maart pa 1:30pm.

Vernon sali zundrando fo'i sala di corte

WILLEMSTAD - Un cabayero cu yama Vernon (di 48 aña di edad), kende ta biba den Bandariba tabata den sala di corte pa motibo cu polisnan a hay'e cu 1 rifle cu el a bisa cu e ta uza pa spanta cacho cune, ya cu e ta un criado di cabrito. Cu luho y detaye Vernon a para splica den sala di corte diaranson ultimo cu e no tabatin ningun mal intencion cu e rifle di hagel, sino unicamente e tabatin e arma aki di candela pa evita cu cachonan ta come su cabritonan. Si e no actua di tal forma, cachonan ta core tras di su bestianan y ta habraca nan, el a sigui splica. Ferfelo ta sinembargo e hecho cu mama di Vernon a declara na polisnan cu e no sa di unda Vernon a sali cu e cuenta di ta cria cabrito, pasobra segun e mama, Vernon no tin ningun cabrito ta cria. Den sala di corte Vernon a lamenta masha cu e no a haya e oportunidad pa muestra polisnan e cabritonan, cu segun e ta bay mondi aya den e area di Ronde Klip, pa busca di come. Hues mr. Sigmar Carmelia a yama atencion di Vernon cu e no tin permit pa arma di candela, como tal e ta claramente den violacion di lei. A haya e acusado tanto cu e arma di candela como e municion perteneciente. Vernon a sigui bisa cu e ta cria bestia,

pasobra como entrada e tin unicamente un onderstand, loke no ta yeg'e. A bini padilanti cu mas biaha Vernon a cay den man di polis pa posesion ilegal di arma di candela. Tanto na aña 2013 como 2014 el a hay'e cu autoridadnan, anto na aña 2015 el a cay cera pa 6 aña. Hues a resumi indicando cu Vernon no a siña nada di pasado, pero Vernon a sigui ripiti cu tur hende cu ta cria cabrito tin un arma di candela pa motibo di e cachonan di mondi. Den pasado caba, esta 10 aña pasa Vernon a yega di hay'e den un tipo di situacion asina ey caba. Remarcabel ta e hecho cu Vernon, siendo mecanico y carpinte, no por logra haya un trabou. Fiscal señora mr. Eva Bos a demanda un castigo di prizon di 21 luna di cua 6 luna condicional y un periodo di prueba di 3 aña. Abogado señora mr. N. Montroos, encarga cu e defensa di Vernon, tambe a para keto na e hecho cu cachonan di mondi sa ta agresivo y violento versus di e bestianan cu su cliente ta cria. Mas aleu segun e abogado e acusado no tabatin ningun mal intencion cu e arma di candela. Hues finalmente a dicta e sentencia di 21 luna di cua 9 luna condicional y un periodo di prueba di 3 aña, combina cu e hecho cu ta tuma e arma di candela den beslag. Vernon ainda despues di e sentencia a sigui murmura, indicando cu claramente e ta mal contento cu e condena. Hues mr. Carmelia a indica cu e ciudadano aki tin 2 siman pa bay den apelacion.

Fortaleza Pa Famia

Tur rudia mester dobla, y tur lenga mester confesa, cu Cristo ta señor

E bataya entre bon y malo no a cuminsa awe, e a cuminsa for di tempo cu Dios a saca Lucifer for di den cielo, kende awe nos conoce como satanas e diabel, e mentiroso, e serpiente antiguo, cu keto bay ta usa su mala maña pa aleha hende for di Dios y hiba nan na perdicion eterno.

E palabra di Dios ta siña nos cu esun cu no kere den Hesus Cristo lo bay perdi, p'esey Dios den su inmenso amor y misericordia a entrega su Yiu unigenito pa ken cu kere den dje no bay perdi pero lo tin bida eterna.

Den Testament bieu 750 aña cu Cristo Hesus a nace e profeta Isaias a profetisa den Isaias capitulo 45:22-23 bisando: Mira na Mi y sea salba, tur e finnan di tera, pasobra Ami ta Dios y no tin ningun otro. Mi a hura pa Mi mes, e palabra a sali for di Mi boca den husticia y lo no bolbe, cu tur rudia lo dobla pa Mi, tur lenga lo hura lealtad na Mi.

Nos tur sa cu Hesus Cristo a nace, biba, muri, y resucita triunfante despues di 3 dia for di morto. Confirmando asina su victoria riba morto y riba satanas y tur su demoñonan.

Den testament nobo Dios ta confirma esey y ta para skirbi den Filipensenan 2:8: Y hayando su mes den condicion di hende E a humiya Su mes, door di bira obedecido te na morto, hasta morto na e cruz.

P'esey tambe Dios a hals'E te na halturanan, y a dun'E nomber cu ta rina tur nomber, cu pa e nomber di Hesus tur rudia mester dobla di esnan cu ta den cielo, y riba tera y bao di tera, y cu tur lenga mester confesa cu Hesus Cristo ta Señor pa e Gloria di Dios Tata.

Awor mirando e direccion cu mundo ta bayendo den dje y cu e palabra di Dios ta cumpliendo tur dia y tur locual ta sosode ta pa acelera e binida di Cristo Hesus.

Nos tur ta wordo spierta cu e Palabra den 2 Timoteo 3:1-9, cu den e ultimo temponan lo bini tempo trabahoso, cual nos tur ta mirando.

Pero e ta bay bira mas fuerte segun locual ta para skirbi den 2 Thesalonisenses 2:1-4 bisando: Awor nos ta pidi boso, rumannan cu bista riba binida di nos Señor Hesus Cristo, y di nos reunion cune, pa boso no wordo movi lihe, for di boso manera di pensa, ni bira intrankil pa motibo di un spirito of un mensahe, of un cu ta bisa cu e dia di Señor a yega caba.

No laga ningun hende gaña boso, di ningun manera, pasobra e dia ey lo no bin prome cu e caymento for di Fe yega, y e homber di pica keda manifesta, e yiu di perdicion, kende ta opone y ta halsa su mes riba tur loke ta wordo yama Dios of obheto di adoracion.

Asina cu e ta tuma asiento den e tempel di Dios, proclamando su mes como Dios.


Mundo ta drelando den un !Show Timeshow! den cual hopi hende lo wordo engaña, esey ta para skirbi.

No laga nos lubida locual Dios a ofrece nos, cual ta cu esun cu kere den su yiu Cristo Hesus lo ta salba, pasobra si nos rechasa Cristo aki na tera e tambe lo rechasa nos dilanti di su Tata cu ta den cielo.

Hesu Cristo ta mescos awe, ayera, y pa semper (Hebreonan 13:8).

Dios ta stima e mundo y E no kier pa ningun bay perdi, e decision awe ta den nos propio man.

Sinceramente, Pastor Marcel Balootje



Laga tur loke ta spera mi ta bunita
Laga tur locual cu mi encontra
na caminda ta bunita
Laga tur locual cu mi laga atras
keda bunita y
Laga esakinan termina den tur buniteza.
Cado Wever.

Cu dolor na nos curason, nos ta anuncia
fayecimento di nos ser stima:

Eusebia Kelly-Boekhoudt

*14-08-1929 - †23-02-2023

Acto di entiero lo wordo anuncia despues

Blessed are the pure in heart:
for they shall see God.

Matthew 5:8



"Dios ta amor... y amor ta Dios, maske mi no ta
na e mundo aki, tur dia lo mi ta banda di boso
Curazon, mi por stens di loke Señor ta hasi"
Salmo 33

Cu dolor na nos curason, nos ta participa
fayecimento di nos ser stima:

Teófilo J. Ruiz

Cariñosamente yama "Papa Folo of Omo Folo"
*05-03-1940 - †24-02-2023

Acto di entiero lo wordo anuncia despues



Gradicimento / Invitacion

Den nomber di nos tur nos kier
gradici tur persona cu di un of otro
manera a sa di demostra nan atencion via
social media, telefon, whatsapp,
personal y email na ora di malo y tambe
despedida di nos difunto stima:

Rodelfina Angeles Leito

mihor conoci como: "Fin, Fina, of Nana"

Un danki special na Dr. Reynold Luchmun,
na mi ruman homber Ronald Nassy cu a
sa di yudami cu mama te na final, na mi
pareha Elvin Boekhoudt cu 24/7 a sa di
yudami cu mama.

Na pastoor Juancho, pastoor Joseph,
pastoor Jairo, Max Hassell y Lily Richardson
pa nan bunita cancionan.

Na tur persona cu a pone mama den
oracion. Na Aurora Funeral Home
especialmente Judith Lattig y Rulyén Martina
pa nan super bon servicio.

Danki na tur personanan, famia y conocir
nan cu a duna nan acto di presencia na ora
di despedida.

Na mes momento nos ta invita famia, bisiña,
amigo(a) y conocirnan pa compaña nos na
3 Santo Sacrificio di misa cual lo tuma:

Dialuna 27 di februari 2023 pa 7'or di anochi
na Misa Birgen di Fatima Dakota

Diamars 28 februari 2023 pa 5:30 di atardi na
Kapel di Alto Vista

Diahuebs 2 di maart 2023 pa 6:30 di atardi
na Misa Papa Juan Palo II na Tanki Leendert.

Acepta esaki como un invitacion personal.



"Señor ta mi wardador, mi'n tin falta di nada
Den cunucu di yerba berde e ta ponemi sosega.
E ta hibami na awa tranquil,
Pa mi bolbe haña forsa".
Salmo: 23

Cu inmenso dolor na nos curason nos
ta anuncia fayecimento di nos tata,
compañero, abuelo y bisabuelo stima

Gilberto van der Biezen

Cariñosamente yama "Betto" y pa tur su
nietonan stima "Papa"
* 19/11/1934 – † 22/02/2023

Na nomber di su:

Mayornan:

† Justiniano y † Felicia Kock-Van der Biezen

Defunto Esposa:

† Vera van der Biezen-Figaroa
Su Compañera di Bida cu a Stime y Cuide:
Martilia "Rika" Colina

Yuinan:

Aisa van der Biezen
Ewald van der Biezen y Linda Geerman
Everard "Gil" y Rosa van der Biezen

Manera Yuinan:

Dinora Dirks
Rustico Dirks
Michael Dirks

Nieto & Nietanan:

Aishly Tromp & Serghio Jansen, Chesly Tromp,
Tacey y Jonas Gampig
Thalysha van der Biezen, Aron van der Biezen &
Yeesam Tam, Tanneesha van der Biezen, Brigitte
van der Biezen

Bisanietonan:

Arzion van der Biezen y Ayla Jansen

Rumannan:

Hypolita Dijkhoff y Famia
† Heronimo "Momon" van der Biezen
Filomena "Mena" y † Fabian Flanegien – van der
Biezen y Famia
Epifanio "Fanny" y Maria Hill -van der Biezen y
Famia
† Jacobo van der Biezen
Tina van der Biezen
Benito "Mito" y Sharina Hernandez -van der
Biezen y Famia
Sylvia van der Biezen y German

Suegronan:

† Geraldo y † Theodosia Figaroa

Swa y Cuñanan:

Margo Kock-Figaroa y Famia
† Pedro Figaroa y Famia
† Stephanus Figaroa y Famia
† Doya Bermudez y Famia
Filomena Orman y Famia
† Emeterio Webb y Famia
† Helena Figaroa y Famia
Christina "Pina" Figaroa

Tanta & Omonan, Sobrino & Sobrinanan, Primo &
Primanan, Ihanan

Un Prima hopi stima pa e famia:

Vera Werleman -Figaroa y Famia

Amiganan di Cas:

Maria Dijkhoff-Henriquez
Greta Koolman, Esposo y rumannan

Famia:

Van der Biezen, Figaroa, Kelly, Colina, Tromp,
Dirks, Gampig, Kock, Jansen, Dijkhoff, Geerman,
Hernandez, Flanegien, Werleman, Tam, Hill,
Webb, Orman, Bermudez, Rozenberg, Bremo,
Becker, Boekhoudt y Franken

Nos ta pidi disculpa si den nos momento di
tristeza nos por a lubida di menciona algun
nomber di famia.

Acto di despedida y entiero lo tuma lugar
Diaranson 1 di Maart 2023 di 9:00 a.m. – 11:00
a.m. na misa Santa Anna na Noord despues sigui
pa Santana Santa Anna.
Ta lamenta cu despues di entiero no ta ricibi
bishita y condolencia na cas

PA SEMPER NOS LO STIMA PAPIE / PAPA



'No tuma vengansa ni warda rencor contra
bo paisano. Al contrario,
stima bo prohimo manera boso mes'.
Levítico 19:18

Nos ta anuncia fayecimento di:

Myloushka Natasha Wernet Burleson

*15-10-1971 - †24-02-2023

Acto di entiero lo wordo anuncia despues.



AWEMainta

Scan nos QR code y bira abonado di AWEMainta

Completamente GRATIS

1: Usando bo camera di telefon,
scan nos QR code na banda.

2. Bay riba "Show Options",
"Open in browser".

3. Yena e formulario.

**Haya AWEMainta
tur dia den bo inbox!**



www.awemainta.com



www.facebook.com/AWEMainta



5880022



info@awemainta.com
noticia@awemainta.com
aviso@awemainta.com